

## La ARLeF e rive su TikTok cun “Tic e Tac Furlan”

Il progjet, che al cjape dentri lis gjenerazions plui zovinis, al à za vût 4500 *followers*, 40 mil *likes* e 900 mil visualizacions

Si clame “[Tic e Tac Furlan](#)” e al è il **gnûf canâl TikTok de ARLeF**. «*Une biele novitât, che i crodin tant – al à fat savê il president de Agenzie Regjonâl pe Lenghe Furlane, Eros Cisilino -. La ativitât de Agenzie e je une avonde svariade e l'impegn par lavorâ simpri daûr cui timps al è costant, cence calcolâ, cemût che al è declarât une vore tal “Plan gjenerâl di politiche linguistiche pe lenghe furlane 2021-25”, la atenzion dreçade a zovinis e gnovis tecnologjiis. Par chest la sielte di rivâ intun dai sociâl che in di di vuê al è tra i plui popolârs fra i adollessents e je stade une evoluzion naturâl. Il nestri impegn a dialogâ cu lis gnovis gjenerazions al è costant e la direzion e somee che e sedi propit chê juste*», se si calcole che in pôc plui di doi mêis de viertidure dal gnûf canâl si regjistrin za plui di 4500 *followers*, cuasi 40 mil *likes* e 900 mil visualizacions.

La interprete di cheste gnove iniziative - che e smire a dâ nozions di marilenghe midiant di videos curts e divertents di massim 3 minûts - e je Greta Fabbro, une insegnante te scuele de infanzie originarie di San Vît di Feagne, che e à sfrancjât lis sôs competencis participant al cors dal Ires “Tecnichis di promoziun linguistiche e culturâl furlane”, promovût de Agenzie Regjonâl pe Lenghe Furlane e dreçât a dâ i struments di marketing e di comunicazion che a coventin par promovi e par valorizâ il patrimoni linguistic. Il so sens fuart dal umorisim, la passion pai travistiments, dutune cu la assistente pelose e “cjacaron” de gjate brasiliane Preta, a parin jessi une misture di sucès.

Lis lôr *clips* a son daûr a appassionâ in maniere particolâr i *followers* che a àn dât acet ae gnove propueste cun tancj messaçs di benvignût e tancj invîts a lâ indenant in cheste esperience che e je sedi istrutive che divertente.

Sul canâl si cjatin i temis plui svariâts cuntune serie di rubrichis tant che “Peraulis”, che e ponte a fâ capî cuâi che a son i tiermins “infurlanâts” e cualis che a son lis peraulis furlanis coretis; “Sbrissadis”, par segnalâ lis interferencis plui comunis de marilenghe cul talian; “FurlanLenghe” par sclari che cognossi il furlan al jude l'aprendiment di chês altris lenghis.

Udin, ai 12 di Dicembar dal 2021

### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche / e-mail: [arlef@caltpr.it](mailto:arlef@caltpr.it)

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<<